

摘藻堂四庫全書薈要

集部

欽定四庫全書薈要

集部

明詩綜卷十



詳校官編修臣王天祿

欽定四庫全書薈要卷二萬四百八十三

集部

明詩綜卷十

翰林院檢討朱彝尊編

基 四十九首

基字孟載其先蜀人居於吳為饒介客吳平安

置臨濠復徙河南既而放歸起知滎陽縣謫鍾

離用薦為江西行省幕官坐罪落職居句曲山

中久之起奉使湖南廣右召還授兵部員外郎



出為山西按察副使進按察使尋被讒奪職供

役卒於工所有眉菴集

徐子元云孟載天機雲錦自然美麗獨時出織

巧不及高之冲雅

王元美云孟載如西湖柳

枝綽約近人情至之語風雅掃地

江東之云

眉菴集穠麗纖蔚大有唐人風味

顧玄言云

庶訪才長逸蕩興多雋永方之錢劉雖未迨元

白斯有餘陳卧子云孟載如吳中少年輕俊

可愛所乏莊雅李舒章云孟載如玉袖臨春

翩翩自喜王介人云孟載詞勝於詩其詠春

草云六朝舊恨斜陽裏南浦新愁細雨中亦不

失為佳

句也

靜志居詩話吳中四傑孟載猶未洗元人之習

故鐵屋亟稱之王元美卮言謂孟載七律尚短

柳如新折後已殘梅似半開時類浣溪沙詞中
語予謂不持此也如芳草漸于歌館密落花偏
向舞筵多細柳已黃千萬縷小桃初白兩三花
布穀雨晴宜種葡萄葡萄水暖欲生芹雨頡頏
枝外蜨柳遮花映樹頭鶯花有底忙衝蜨過鳥
能多慧學鶯啼且自細聽鶯宛宛莫教深惜燕
息息春色自來皆夢裏人生何必在尊前燕子
綠蕪三月雨杏花春水一羣鶯江柳淨無餘葉
在渚蓮池有一花開花裏小樓雙燕入柳邊深
巷一鶯啼江浦荷花雙鶯雨驛亭楊柳一蟬風
山頂雪惟朝北在水邊春已自東來一路詩從
愁裏得二分春向客中過春水染衣鸚鵡綠江
花落酒杜鵑紅高樹綠陰千嶂濕野棠疎雨一
蘿香立近晚風迷蛺蝶坐臨秋水映芙蓉羅幕
有香鶯夢暖綺窗無月雁聲寒眉暈淺顰橫曉
綠臉消殘纈臘春紅小雨送花青見萼輕雷催

笋碧抽尖蠶屋柘烟朝焙繭鵲爐沈火晝熏茶
試填入浣溪沙皆絕妙好詞也然其五言古詩
足與季迪方駕集亦張企翱所編吾鄉項氏天
籟閣藏有孟載手錄眉菴集六卷中闕七言絕
句以勘張本
亦無大異

感懷 六首

蝮蛇冬未蟄靡草寒更生
陽光泄為雷地雷忽有聲
上天號令乖致此災異并
不然多殺傷兵氣之所成
漢庭免三公母乃非政刑
願言調玉燭仰見三階平

一女不得織三人欲無衣
一夫不暇耕八口皆啼飢

寒迫于身誰能不為非西伯善養老仁人為己歸霜寒
草木落禽鳥相背飛民心亦何求在於得所依此理勿
暫失君子慎其微

鵲巢知避歲終為鳩所居巧者勞不足拙者安有餘溪
翁夜結網山人朝煮魚隆準入關中不讀半卷書當時
微張韓乃與勝廣俱大拙乃至巧巧者復何如

驂騑日千里亦在御者功向無造父能乃與凡馬同韓
彭曼駕材驅策遇沛公增本渥洼兒意不與項通豈獨

知馬難所貴御馬工駕御苟失宜鮮不敗乃翁蕭蕭帳
下騅千駟何足雄

韝鷹斂六翮棲息如鷓鴣秋風颯然至聳目思凌霄英
雄在承平白首為漁樵匪無搏擊能不與狐兔遭長星
亘東南壯士試寶刀落落丈夫志悠悠兒女曹

東鄰夜從軍西鄰曉上官一為死別愁一為知己懽懽
者承新恩拂拭頭上冠愁者囑妻孥結束跨下鞍悲懽
何不同一危復一安黃塵障東華平地生波瀾朝榮夕

賜死轉盼異暑寒寄語承恩人莫歎從軍難

送謝雪坡防禦出郭團練

朝催築城夫暮點團結兵民皆動搖一日十數驚所
賴官長賢撫勞得衆情防禦出郊來父老拜且迎垂髫
及戴白羅列車下聽官家百萬師自足與寇爭汝自守
汝鄉汝自保汝生閒暇苟不虞倉卒恐見傾我當徼汝
勞薄爾賦稅征父老共感激闐然動歡聲旌旗泊甲子
五色稍鮮明豈惟備抄掠大敵固可嬰問君何能然子

弟衛父兄平川雨初收馬嘶鼓鑿鑿相送不同往極目
秋鷹橫

送陳資深歸廣

丈夫輕別離投老欲入廣奈何干戈際萬里涉沅澧茲
城頗阜庶有女供奉養世亂得麤安胡勞問鄉鄙君言
苦無家一夕魂九往鄉書昨日至捧讀屢泚頰四喪寄
淺土未得掩諸壙雖云敝廬在誰復修祀享感茲歸意
迫無力猶勉強齒髮固已衰尚足嬰擾攘敢忘鄉土情

偷安戀茲壤吾聞重感激惜別復加賞天寒霜露繁
撼枯葉響水宿慎蛟螭山行避魍魎田園雖荒蕪果實
羅栗橡鄰居喜均還相邀具醅盎酒薄不得醉且復歌
慨慷人生還鄉樂無物堪比彷彿喜極繼以悲歡戚同反
掌翻思蘇臺月照女夜績紡此時父子情兩地同惚恍
安得混車書妻孥共羅幌茲事竟難期淚眼一悽愴我
家嘉陵江蹤跡久飄蕩亦欲問前途逡巡覓西瀼

吟靈巖和韻周左丞伯溫饒大參介之

單艦集羣英席窄坐每盞烟橫半掩寺木落全見塔斜

流出渠分曲徑轉溪合村妝妍醜並野話悲笑雜童操

吳音問僧作梵偈苔霜苔滑難躋露棘手易拉磴紆螳

緣樹扉啟蝸啓闔娛賓列五豆禮佛過三市晴厓暝憂

雨秋洞寒疑臘窗攀盜果猿擔入避鷓鴣掬池萍沾袖

憩石鮮污衲琴忘荒臺弄屨響回廊踏值險慮思筇得

竒即傾榼感深怒鬚磔愁極衰鬢颯華年倏川駛雅量

浩海納嘯歌激欵欵雄辨肆交沓禪寂虛無量道祖清

靜蓋四囂蝸觸蠻變幻雀化蛤狂遊類飲酎薄宦避嚼
蠟終當謝塵鞅掃屋分坐榻

贈別龔行義

楚龔風雲姿璞素玉不琢隻身躡雙屐十載食破研麻
衣閱冬春睥睨狐貉賤胃中何所蓄經史子集傳酒酣
文思涌強弩機發箭清真謝鉛錘越女巧笑倩紆盤珠
九曲精粹金百鍊粲如星森羅勇若軍後殿吾黨多英
雄氣索皮肉戰西風忽歸來塵土吹滿面從容問所歷

搖首不復辯但云秋水清吳松淨如練方同華表鶴遽
作幕上燕去住何太輕弗得絆以綫君材非樗櫟名字
已交薦淵泉暫蠖屈霧雨終豹變賢達坎坎坷多豪傑窮
乏先嗟予書中蠹齧消兩目眩朝騎瘦馬出夕飽藜與
覓志慙點爾狂質匪由也嘖猥遭周秦厄不識舜禹禪
因君動遐想翅塌足若胃螺卮白磁罌聊為江渚餞回
首芙蓉花紛紛落紅片

與陳時敏別

近別會有期遠別易慘悽一人失意行衆賓顏色低相
顧各無語握手立大堤白沙飛輕烟赤草漫路蹊竈戶
八九家皮肉瘦且鷺再拜謁官長鵠立無所齋孤廳如
荒郵壁落新補泥日沒官吏散角角野雉啼歸來對寒
燈兒女相孩提雖云去鄉國喜不聞鼓鼙官卑職易稱
牛刀用割雞回首華亭鶴月白露淒淒

季迪病目醫令止酒因作此勸之

病目須飲酒飲酒調微疴氣血鬱不舒賴此酒力和所

以雷公方製藥用酒多活血必酒洗散鬱須酒磨製藥
既用酒飲酒良匪他酒可引經絡酒能驅病魔病目不
飲酒此蓋醫者譌李白好痛飲不聞目有瘞子夏與丘
明不為飲酒過飲酒既無害不飲如俗何清晨呼東家
買置數斗醯爛醉瞑目坐滿面春風醜陶然物我忘夢
見孔與軻此藥豈不佳而乃止酒那我今勸君飲君意
無媿庸醫或見責請示眉菴歌

贈毛生

丈夫遇知己勝如得美官
棲棲無聊中握手意便懽
古來豪傑人所就非一端
狂言與危行初若不可干
從容兩陣間一語九廟安
狐貉不外飾而足禦大寒
嗟嗟隴西李願識荊州韓

長洲春

縠波流暖雲花光豔綠
蘋津頭洗紅女蝴蝶上
羅裙秋水上明璫
搖白槩飛下雙鴛鴦
溘溘潮水響

滄浪波

入苑綠泱泱穀文融暖光東風吹白浪照見赤龍堂
龍堂負貝闕陰火春波熱鮫人賣髻綃夜夜唱明月

登南浦

開船別西山迤邐向南浦帆輕去自速初不用篙櫓
蒼烟中樹橐橐響斤斧一女沙上汲衆漁洲畔語我行
歲云晏况復遠儔侶回首北歸鴻翩翩下寒渚

過小孤

大孤俯如盤小孤儼而立羣山如從使左右相拱揖孤

根屹撐拄萬竅爭噴噏瀏瀏陰風旋慘慘元氣濕江流
亘其下震怒莫敢汲泆為盤渦深馳作奔馬急躋攀或
失手一駛不可及我來值秋晚木落衆鳥集勿爨夜船
犀鮫人抱珠泣

望南嶽

我從匡廬來但覺諸山低嵯峩望衡嶽雲霄與之齊下
有赤蛇蟄上有朱雀棲仰瞻祝融拔俯揖紫蓋迷五嶺
皆培塿三江為涔蹄巍然南服尊嵩霍相提攜封秩崇

君稱諸神咸朝
際丹書篆寶冊
萬古封金泥
百王重祀典
赤繅藉玉圭
自非精靈通
牲帛勞焚齋
子方向遠道
無由陟層梯
蒼蒼烟霞中
喔喔聞天雞
緬思昌黎伯
恭默開雲霓
靈貺自昭格
誠敬良可稽
斯人久云沒
感念徒含悽

發衡州

五日白一髮
十日皺一膚
人生冰雪容
終作鞞紋麤
今朝清鏡中
已與昨日殊
不憂鬚眉蒼
但恐皮肉枯
肉枯

亦常理所念非壯圖有親恩最深撫養勞動劬憐我幼
失怙愛我如掌珠斯恩未及報不敢忘須臾書來得凶
問哀頓空號呼衣衾與棺斂弗得親走趨家山在萬里
那能返故都樹頭啞啞啼媿殺反哺烏有子初學言行
步要母扶已解索梨栗未知識之無重在託宗祀豈暇
問賢愚弟妹皆飄零遠在天一隅仲氏久無信夢中時
友于艱難斤鹵濱何以保微軀計工當已還母乃東歸
吳童僕各分飛僅有赤脚奴矜孀苦肺疾終夜聲嗚嗚

憐渠亦解事剪伐供樵蘇異鄉骨肉遠賴此相支吾嗟
我客梁楚隻身亦崎嶇白晝畏豺虎夜防狸與狐所賴
筋力强竄伏幸無虞今年覺衰倦自怯行遠塗東風洞
庭波落日青草湖魚龍來欺人烟濤慘糶糊茲晨過衡
陽霽景差可娛桃花白練帶春水綠菰蒲感此顏色妍
暫使憂心甦萬事信有命撫膺長歎吁

湘江道中思常宗

暮江散微雨風定波自碧一鷺立不飛雙鴻遞相直餘

烟菱女唱新月漁郎笛此處忽懷人相思杳何極

遠浦歸帆

輕帆挂春風倒影湘江綠天低浦溆遠歸向誰家宿遙
指落花西黃陵廟前屋

洞庭秋月

湘水秋更清湘月秋更白光輝一相蕩水月不辨色何
處洞簫聲巴陵夜歸客

湘女

湘水既瀟瀟湘山亦峩峩空明影上下但覺魚鳥多我
方駐輕橈聽彼湘女歌湘女佩幽蘭徐行拂青莎春風
吹衣裾芳香動微波淑質自妍麗不待綺與羅真修慎
所適窈窕山之阿盈盈青樓婦日暮將如何

清溪漁隱

清溪秋來水如練歷歷魚蝦皆可見綠簑酒醒鴈初飛
風急蘆花吹滿面溪南一帶是青山逢着垂楊便可灣
謾道白鷗閒似我漁舟更比白鷗閒

聞蟬

眉菴四十未聞道偶於世事無所好尋常惟看東家竹
屈指十年今不到微軀之外無長物寒暑一裘兼一帽
妻孥屢欲升斗絕不獨無烟亦無竈身輕自笑可駕鶴
眼明豈止堪窺豹人情世故看爛熟皎不如污恭勝傲
有瑕可指未為辱無善足稱方入妙此意于今覺更深
靜倚南風聽蟬噪

廢宅行

弓刀挂牆旗拂瓦行人過門須下馬日暮將軍縱酒歸
白棒橫街人亂打朱門一閉春草積官印斜封泥浣壁
守卒收蝦屋後池鄰翁曬麥階前石簾幕當年盡綺羅
網絲顛倒腐螢多杏梁風雨丹青濕時有野鳩來做窠
樓臺易成還易廢前年猶是桑麻地

聞鄰船吹笛

江空月寒露華白何人船頭夜吹笛參差楚調轉吳音
定是江南遠行客江南萬里不歸家笛裏分明說鬢華

已分折殘堤上柳莫教吹落隴頭花

長江萬里圖

我家岷山更西住正見岷江發源處三巴春霽雪初消
百折千回向東去江水東流萬里長人今漂泊尚他鄉
烟波草色時牽恨風雨猿聲欲斷腸

秋霽雜賦

三首

劉表知先主懷王識沛公未聞收夏口先已入關中今
古車書異興衰厯數同方驚雞作鳳當信鶩非鴻

今日長洲苑秋風列羽旗不圖新約法復見舊威儀鼓
舞兒童樂歌謠父老悲烟埃方袞袞禾黍正離離
晚樹霜猶碧秋花雨未黃戎衣輕繡錦旅食尚糟糠驛
路千山隔河流一葦航毋憂兵不戰已定法三章

雨

雨急愁雲黑窗虛愛竹青石泉流細細山鳥去冥冥醉
裏傾荷葉飢來煮茯苓不知劉道士何用換鶩經

偶題

身嬾交游絕時危感慨新清江催短鬢芳草怨歸人花
落縱橫雨鶯啼淡蕩春欲搖舟楫去波浪没平津

送王仲容之上海

薄宦依東海孤城隔戍烟花疎寒食後人遠暮帆前深
巷編蒲履斜岡種木棉毋煩厭荒寂微祿有畬田

寄海鹽楊若官

海嶼通村險邊城出敵遙旗燈秋塞雨鈴柝夜溝潮士
飽爭投石農閒數舞劄毋令廢收穫高隴有枯苗

夏夜有懷

重露澄秋色輕風生夜涼
碧看湖草亂紅愛渚蓮香
有弟徒相憶何人不異鄉
悲茄在城上雙淚落衣裳

贈翟好問

笑爾山城隱柴門對縣衙
酒資千畝芋生計一園瓜
雨步荷巾濕風吟蓆帽斜
時時扶短杖看竹到東家

長沙雜詠

湘人愛樓居斜枕湘江起
樓下倚闌人簪花照春水

夢綠軒

夢裏綠陰幽草畫中春
水人家何處江南風景鶯啼小
雨飛花

吳中行樂詞

單羅小扇夾紗衣
冠子梳頭插翠薇
知是范家園裏醉
無人不戴杏花歸

紅綠蕉二仕女圖

兩樹紅蕉隔禁扉
曉涼攜伴試羅衣
金鈴小犬迎人吠

應怪秋來出院稀

故山春日

千花萬萼委塵埃，只有荼蘼獨自開。
應是鄰家更零落，過牆蝴蝶又飛來。

遇史克敬詢故園

克敬自長洲來，因詢吳中風景，大異往昔，賦此以寓鄉里之思。

三年身不到，姑蘇見說城邊柳半枯。
縱有蕭蕭幾株在，也應啼殺樹頭烏。

贈京妓宜時秀

欲唱清歌却掩襟
晚風亭子落花深
坐中年少休輕聽
此曲先皇有賜金

到江西省看花次韻

生色屏風一面開
輕羅團扇合懽裁
深深院落青青柳
縱是無花也看來

鯉魚山阻風天甚寒雨皆成霰

江南天氣大無憑
草色烟光暖欲蒸
向晚鯉魚風乍急
盡吹小雨作春冰

望武昌 二首

吹面風來杜若香
離離烟柳拂鷗長
人家鸚鵡洲邊住
一向開門對漢陽

春風吹雨濕衣裾
綠水紅粧畫不如
却是漢陽川上女
過江來買武昌魚

祁陽道中

疎烟小雨濕流光
愁得楊花不暇狂
半晌春晴便飄蕩
綴人簾幕上人牀

張

羽 二十三首

羽字來儀以字行更字附鳳潯陽人從父宦遊
江浙兵阻不得歸遂居吳興元末授安定書院
山長明初徵起廷對稱旨擢太常司丞兼翰林
院同掌文淵閣事以事竄嶺外未半道召還抵
京知不免自投龍江死有靜居集

張企翔云國初以高楊張

徐比唐之四傑故老言不惟文才之似而其攸
終亦不相遠眉菴盈川令終如一太史之斃同
乎賓王北郭雖不溺海僅全首領而非首丘先
生投龍江又與照鄰無異噫亦異矣 王元美

云張來儀徐幼文如鄉士女有質有情而乏體
度程孟陽云靜居五言古詩學杜學韋各有
神理非苟然者歌行材力馳騁音節諧暢不襲
宋元格調律詩清員渾脫不事雕績全是唐音
頡頏高揚未知前後或謂張
徐不及高揚此耳食之論也
詩話來儀五古微嫌鬱轆近體亦非所長至於
歌行雄放駁駁欲度季迴前固當舍起幼文跨
載躡孟

春初遊戴山

雲羅橫四海田野無遺英尚賴二三子共怡山水情
煦煦新陽動寥寥天宇清昔人稱四美茲晨遂成并前登

高丘阻遙睇澄湖明憑林招遠風松檜自成聲俛仰天地間微軀良不輕安能自羈束坐使衆累縈處賤足為貴抱素詎非榮逍遙解神慮庶以適吾生

春山瑞靄圖

鶯啼山雨歇前川綠正繇人家在深樹雞犬晝無喧澹澹流水意依依田父言謾鼓木蘭楫往溯桃花源即此堪結廬可以傲華軒

立秋日早泛舟入郭

連霖啓秋期金氣晨已兆溪雲合餘陰水霞相照耀登
艫泛涼飈乘流駕奔峭迴波蕩塵襟青山列遠眺蒲葢
迷森沈菱荷爭窅窕沙明衆女沆潭淨孤禽嘯端居積
百憂暫出窺衆妙好爵豈不懷衛生乃其要寄謝滄海
人如子可同調

擬過園隱阻雨

在遠每傷離在近還成隔飛雨渺無涯佳期悵難得人
寒市井空天晚江潮白知君掩閣卧終朝遲來客

金川門

兩山夾滄江拍浮若無根利石侔劍戟風濤相吐吞維
天設巨險為今國東門試將一卒守堅若萬馬屯吾來
犯清曉天空霜露絲列宿森在列北斗峭可援江光合
海氣溟滓神攸存俯視不敢唾中有蛟龍蟠浮屠者誰
子高居凌風幡下見渡口人擾擾蠡螳諠媿彼超世士
去去將何言

李辰山云是詩作於洪武甲寅末三十年而燕師從此入矣讀之可勝浩歎

清口

豁達兩河口前與黃河通高岸忽斗折清淮匯其中甘
羅城在南韓信城在東一為秦人英一為漢家雄人生
有不死所貴在立功方其未遇時鹿鹿何異同時命苟
未會丈夫有固窮舍舟登高防歲暮百草空坡陀隴畝
間一二老弱翁遺跡不可問但見荒榛叢行行重回首
目斷雙飛鴻

余將軍篆書搨本歌

即忠襄公闕也

余將軍守舒州舒州之城大如礪長江西來繞城流賊

船如雲壓城破將軍提劍城頭坐劍未動虜已奔鯨鯢
蔽江江為渾孤軍六年二百戰王師不來城自存無兵
猶足戰無食安可支豈無愛妾與愛馬殺之不解壯士
飢力盡矢竭將奚為倉皇齮舌罵不已義士千人同日
死祇今還有盡忠池碧血清冷化為水將軍持節東州
時作此篆書形崛竒妙墨已隨神物化好事當時臨得
之雖非其真意獨在垂金屈玉蟠蛟螭我拜重是忠臣
跡秦相雖古其人非嗚呼將軍此書配者誰請君摹取

浯溪石上中興碑

畫雲山歌

我昔曾遊廬岳頂欲上青天凌倒景山中白雲如白衣
片片飛落春風影雲晶晶兮花冥冥萬壑盡送洪濤聲
恍然坐我滄海上金銀樓觀空中明上清真人笑迎客
夜然桂枝煮白石手持鳳管叫雲開虎咆龍吟山月白
明發邀我升東峯導以絳節雙青童天雞先鳴海出日
赤氣照耀金芙蓉屏風九疊花茸茸霧閣雲窗千萬重

胡不置我丘壑中一朝垂翅投樊籠空留萬片雲挂在
清溪千丈之寒松愁來弄翰北窗裏貌得雲山偶相似
遂令殘夢逐秋風一夜孤飛渡江水夢亦不可到圖亦
不可傳不如早賦歸來篇山之人兮待我還安能齷齪
塵土間坐令白雲摧絕無所歸青山笑我凋朱顏

米南宮雲山歌

古之畫法不可見六朝人物留遺譜後來山水出新意
二李三王差可覩洪谷之後有關荆營丘渾雄獨造古

華原處士志竒崛餘子紛紛何足數
郭熙平遠疑有神
北苑爛漫皆天真
畫院宣和衆史集
俗筆姿媚非吾倫
豈知南宮迴不羣
一掃千古丹青塵
神閒筆簡意自足
窈窕青山行白雲
黃侯黃侯安得此
元氣淋漓猶滿紙
晴窗拂拭對高秋
恍忽神遊華山裏
生平畫癖奈此何
為子試作雲山歌
珍藏什襲子須記
世間名畫今無多

李遵道墨竹歌

墨竹昉自何人始
輞川石刻今餘幾
後來蕭悅稍出羣

香山侍郎獨稱美洋州太守善寫真長帽先生差可擬
江南謾作金錯刀枝葉離徒何足齒北方作者誇澹游
房山繼之妙莫比吳興公子最擅名同時亦數薊丘李
薊丘有嗣能傳家筆勢翩翩此其是一筆玉立無因依
風露淋漓猶滿紙想當塗灑發幽興靜對山僧北窗裏
江湖無人老成盡百藝荒涼今已矣展圖三歎墨君堂
秋聲滿座悲風起

唐子華雲山歌

前朝畫品誰第一房山尚書趙公子二公何以能絕倫
丘壑乃自胸中起由來書畫總心畫政自不在丹青裏
當時豈無劉與商屏障紛紜何足齒唐侯本是雲川秀
愛畫彷彿董與李長松平遠早已工更上歙州看山水
歸來却師郭咸寧參以房山勢莫比始知絕藝老更成
庸夫俗輩那知此此圖三尺誰為贈雲氣蒼茫石塊磊
牛羊未歸樵子出戶牖寥落蒼厓厓寫成不題歲月字
要是頭白居易鄉里乾坤浩蕩江海空後人未續前人死

為君題詩三歎息世上好手今餘幾烏乎尚書公子不
復見得見唐侯斯可矣

畫山水行

題趙待制仲穆所畫江浦歸帆
秋林瀟灑二圖沈才幹所藏也

古來名畫傳父子唐有二李蜀兩黃吳興公子冠當代
雍也繼之早擅場宋祖子孫盡龍種毛骨固是非尋常
珊瑚寶玦久零落空有妙藝傳文章至元天子親召見
徒步便賜中書郎奏圖每得天顏喜盛以金匱白玉堂
遂令世人爭貴重門戶雜遝如堵牆雍初騰蹕晚一蹶

五陵豪氣無時忘吳姬越娥坐相擁始肯落筆揮縑緗
五日十日一水石屏障彷彿生輝光君家雙圖何所得
私印乃出牟陵陽一圖汗漫秋水闊鴈鴻排序投瀟湘
山僧悄尋孤寺遠客子喜甚高帆張一圖律兀衆峯出
疎林葉赤天雨霜消搖巾舄者誰氏可是商顏之綺黃
風塵瀕洞二十載玉軸錦題多散亡圖書祇應天上有
人間那得千金藏從來好事多成癖雲烟過眼如毫芒
君不見王家桓家勢盡時複牆走輟不得將何如城南

佳山水千巖萬壑摩青蒼與君對此飲美酒雖無南
宮北苑庸何傷

米元暉雲山圖

前代幾人畫山水逸品只數南宮米海嶽樓前北固山
頃刻雲烟生滿紙古云丘壑起心胷恍忽似與神靈通
素壁高懸卧清晝耳邊恍若聞松風怪底青山起毫末
森沈綠樹臨溪活仙人道士疑可招芝草琅玕俯堪掇
千里能移方寸間天機揮灑過荆關如今畫史空無數

對此高蹤詎敢攀

倪元鎮畫竹沈御史所藏

雲林之子有仙骨平生好潔如好色紛紛濁士等沙蟲
嗚呼瓚也何由得憶昔常登清閔堂鵲尾爐執龍涎香
紹京妙墨僧繇畫示我不啻千明璫人間萬事如飛電
洗玉池空人不見季子城東土一坏何人為著黔婁傳
繡衣使者騎青驄曾聽竹枝湘水東歸來見此若夢寐
巴陵洞庭生眼中江湖豪翰今零落君得此圖良勿薄

媿我題詩憶故人黃鶴題詩下寥廓

錢舜舉溪岸圖

憶昔至元全盛日天子詔下徵遺逸吳興八俊皆竒才
秀郎王孫稱第一一朝王馬去朝周諸子聲名總輝赫
豈知錢郎節獨苦老作畫師頭雪白江南沒骨傳者希
錢也得法誇精竒晴窗點染弄顏色得錢沽酒不復疑
今人祇知重花鳥豈識此圖奪天巧玄雲抱石雷雨垂
蒼山夾水龍蛇遶岸側溪回共杳冥蒲稗深沈映魚鳥

漁舟乍隨遠烟散客子競渡澄江曉自云布置師北苑
只恐庸工未深了卷餘更有魏公題字擬鍾王差未老
鄭侯得之恐神授使我一見喜絕倒雙溪流水清何極
城外南山空黛色文章翰墨何代無二子疇能躡其迹
為君題詩三歎息於乎古人難再得

胡廷暉畫

畫師我識吳興胡身長八尺蒼髯鬚目光至老炯不枯
藻繪萬象窮錙銖大兒十歲能操觚小兒五歲能含朱

得錢但供酒家需時復縱博為歡娛魏公家藏摘瓜圖
妙筆奚翅千明珠胡一見之神頓蘇以指畫肚潛臨摹

落筆便與前人俱祝融撐空閣道孤朝雲暮雨相縈紆
中天碧瓦仙人廬下有桃源風景殊雞犬似是先秦餘
潯陽野客山澤臞自從喪亂遭窮塗幸逢治世容微軀
堯舜亦有巢由徒已辦小艇長鬚奴便欲往從漁父漁

江湖此境何地無

趙文敏公家藏小李將軍摘瓜圖歷代寶之嘗倩廷暉全補暉私記其筆

意歸寫一幅質公公大驚賞謂其亂真由此名實俱進故詩及之

青弁雲林圖

前代何人畫山水長安闕仝營丘李華原特起范中立
三子相望古莫比亦有北苑與河陽後來作者誰能當
米家小虎出逸品力挽元氣歸蒼茫房山尚書初事米
晚自名家稱絕美藝高一代誰頡頏只數吳興趙公子
當時弭節匡廬峯曾寫太平興國之神宮五峯却立疑
爭雄臺殿突兀紛青紅中有雲氣隨遊龍我對此圖卧
三日遂令竒氣生心胃亂來學士遭漂蕩文藝草草誰

能工筆精墨妙心更苦那得再有前賢風於乎乾坤浩
蕩江海闊使我執筆將安從

莘叔耕畫梅雪軒

自注叔耕名野世
居湖州蓮花莊

好畫誰如莘棗強墮馬折肱猶未忘何年寫此寒林趣
精絕未數左手王屋裏何人坐吹笛似是南昌郡中客
曲終朔雪忽飛來開門滿樹梅花白

贈琴士

有客夜半來山中橫琴坐石彈松風松風曲罷抱琴去

金
夕
口
人
之
二
卷
十
落月一聲天外鴻

聽老者理琵琶

老來絃索久相違
心事雖存指力微
莫更重彈白翎雀
如今座上北人稀

取勝亭感舊

細雨微消紫陌塵
湖光冷落似無春
朱門記得曾遊處
楊柳青青不見人

寄天目山雍長老

天目之山青茗堯道人縛屋青山椒白雲出山不歸去
春風吹老黃精苗

燕山春暮

金水橋邊蜀鳥啼玉泉山下柳花飛江南江北三千里
愁絕春歸客未歸

徐賁 二十七首

賁字幼文其先蜀人徙居吳淮張開閩辟為屬
避去之吳興隱蜀山中洪武初用薦授給事中

改監察御史出按廣東改刑部主事授廣西參

政遷河南左布政使尋下獄死有北郭集

王元美云

方伯體裁精密情喻幽深頗似錢郎顧玄言云方伯詞采道麗風韻淒朗殆如楚客叢蘭湘

君芳杜每多惆悵

詩話呂志學題幼文所畫山水圖謂肆筆道麗清潤而帶書法於詩亦然才氣方之高楊張三君稍為未逮然詩法浩然森有紀律長篇險韻極其熨帖頗有類皮陸者張來儀先從吳移居戴山以詩招幼文云吳興好山水子我盍遷居繞郭羣峯列迴波一鏡如蠶餘即宜稼樵罷亦堪漁結屋雲林下殘年共讀書幼文乃移居蜀山兩山蓋相望也

猛虎行

爾虎從何來據住三叉口昨日啖東家猪今日噬西家
狗山中百獸不敢鳴白楊黃竹陰風生鄰家少年憑意
氣彎弓挂箭巡山行夜深月黑候虎出明朝荒草餘白
骨

農父謠送顧明府由吳邑陞常熟

我家茅屋臨官道前種桑麻後梨棗年年力作不違時
人有餘糧牛有草官長下車今五年老身不到州縣前

鄉無吏胥門戶靜家家盡稱官長賢大男入郭買田具
始知官長移官去來時憶向官道迎今日去時須送行
攀轅欲留留不止我民倉皇彼民喜殷勤再拜官道旁
願飲三江一杯水

柳短短送陳舜道

柳短短春江滿蘭渚雪融香東風釀春暖山長水更遙
浩蕩木蘭橈蘭橈向何處送君南昌去離愁落日烟中
樹

白蘋花送王汝器

白蘋花綠蘼草南風吹碧波五月湘江道行人勸酒離
緒多擢女擢郎歌擢歌黃鸝啼時風景好大堤日落奈
君何君今去不可留山疊疊水悠悠

八月十五夜飲王擴相川別業得動字

風高海雲收月出天宇空今日寒暑均適與諸君共懽
深坐忘永契合飲易痛露螢寒不飛水鳥夜停唳山精
各潛匿銀蟾忽飛動亭亭廣寒桂不知何年種我欲問

嫦娥素鸞無由控佳節屢變更壯心久恹恹人生非仙
骨有樂當自縱惜無桓伊笛為爾作三弄

過荷葉浦

粼粼水溶春澹澹烟銷午不見唱歌人空來荷葉浦無
處寄相思停舟采芳杜

尹明府吳越兩山亭

長江接海門一水限吳越兩山鬱相對峯巒各羅列勁
勢爭吐吞蒸嵐互出沒尹君好遊觀結亭山水窟闌干

出層巔細路縈百折崩石絡垂蘿老樹著棲鶻平生登
臨興盡為山水發不知嘗膽人此地幾征伐至今兩山
雲來往似奔突嗟余客江海所歷多奇絕何當上斯亭
長歌弔遺烈

蒼筤軒

小軒閔幽寂迴闌碧筠護寒色晴裊池垂梢晚縈露陰
凝訝烟積籟起知颺度瑟瑟含夕清蕭蕭澹秋素不有
虛心人何由同歲暮

菜邁為永嘉余唐卿右司賦

遠辭華蓋居來卜山陰宅乍到俗未諳久住地旋闢屋
廬尚樸純楹桷謝雕飾高營踞山跗深甃逗泉脈檐將
狼尾苫門用鼠筦織缺垣惟補蘿圮砌總蒙藹編籬限
邇鄰封枿表殊場本來是野性豈是耽地僻學圃欲擬
樊為功敢侔稷寧惜勞外形自甘食餘力耕鋤限兒課
灌溉當僕役破塊何昉昉陳器亦畎畎駕許俗士回屐
向鄰翁借筐筥織湘材鋤鍤鑄棠液卓鑊鷹觜利負蓑

蝟毛磔俯仰疲桔槔沾灑漬襪襖循畦行策鋤偃林卧
欹石鎌披欲芟丘刈削竟驅磔值阜即為坡遇凹就成
洫堤崩防密葭竇隙拒亂棘地同農畝計區學井田畫
長畛縱復橫曲渠廣還窄接流引餘清疏沼滙深碧架
桁秋實垂籬落夏蔓罨雨露加膏腴糞土發磽瘠識種
題裏藏辨類分行植時法常按譜候時即看歷歲芽拳
握紫薑檠拇駢赤兩合憐薊葦叢生愛鉞芑初簞迸蟄
雷新臺長春菽雀弁荒葉峨馬帚芥莖直黃繁微礎絲

瓠老枯瓣拆芍苗卷龍鬚藥幹擁牛膝黃獨雪晴收紫
綦露晞摘陰階茂蔗危下田豐菲蔥卷輪木耳垂攢刺
菱角射秋茄采更稀夜韭剪仍殖芝芳凝海瓊菱鬱點
池墨枸杞香可醪竹菇熟堪腊石皮被柔薄土酥膾肥
酌細蓴入饌鱸鮮萋雜羹鯽茶苦檠與倚菘脆冰為敵
菌櫨西蜀致苜宿大宛得長縈行帶流亂簇陳絲繹芹
效野人獻瓜為天子副決明纔一方萵苣連數席瑯縠
慰渴心玉延起羸疾葶毒笑非喜芥辛泣詎戚盤根芽

糞壤脫穎笋穿壁擲香憐雞蘇折甘嗜燕麥粟腐切方
圭乳餅斲員璧孕子梭受剗贅珥石被馘兔目淘夏槐
鹿角毛臘炙菁託諸葛呼巢以元修斤

諸萬元修
二菜名

覓裛蔡

守清薇怨周節逆邪蒿義所攘穢蔓理堪啞薄利嘉拔
葵省諉惡遺蕙窮餐酸齏黃儉啖薤留白閒情付田園
生意仰膏澤莢齊翠疑剪甲圻綠訝擘掩冉烟際姿蔥
菴雨餘色始掇惜滓染載滌畏蟲螫新薦或在籩薄湘
亦須鬲求久漸投醪致爽遽沃醑不煩僚友送敬向先

聖釋對屠誇大嚼燕客忻小摘梓羞不過三甕菹當飫

百未能著蔬經安敢踰食籍旨蓄足山厨素供過香積

用茲卒歲年庶得勤朝夕賓魏徐見厭厄陳顏自懌潔

畚工恥污造橋盜懷恤抱甕忿設機授書誚求益

用侯君房

微巖光事縱馬因致憂吞蛭遂亡謫萬錢柳復乞片金華還

擲仕知呂姪妾居味鄭人識枕肱仲尼樂傷指范宣扼

鼎臠固云嘉食單亦足適敷淡分所安堪味欲易極毋

因口體累遂使愆民德

登戴山

在湖州臨湖門外二十里

平田渺空曠孤岡忽高峙新松蔭其巔白石繚其趾初
登若蘄絕稍上乃如砥亭亭日晷側肅肅征鴻駛南招
天目雲北覽具區水比來局羈絆遊遨喜茲始同心良
可重懽言得佳士非惟外累遺沈憂亦成委薄暮聊旋
歸餘興會留此

種菊

蕭條齋舍前隙地頗高爽茲焉倦耘鋤而乃成廢壤適

來學種菊始為驅草莽掩苒籬落間枝葉紛以長雖煩
灌溉勤亦藉雨露養秋香固所悅晚節益可仰匪曰表
隱名聊以備幽賞

荆山

荆山揭高厓塗山聳橫粵長淮出兩間中斷見斧鑿於
焉東洪流浪起石關角誰能為此功在昔大禹作至今
遺廟存香火乃寂寞我來問邑人往事竟緬邈於時春
正深草木尚荒落登臨欲開襟覩茲反不樂

壽州

舟行夜達曙路入硤石口平山帶孤城一塔起高阜問
知古壽春地經百戰後羣孽當倡亂受禍此為首彼時
土產民十無一二有田野滿蒿萊無復識畝去程不
可稽欲望敢遲久

潁川

客程不論遠所愁在陰晦惡風滿川來雨勢晚逾倍船
爭急流上寸進還尺退枯葭夾崩沙路轉數百匯颯颯

孤篷飛琅琅萬珠碎篙師左右呼坐客默與對去心雖
云迫前途苦茫昧德星無後覩洗耳亦何在有懷仰高
風令人發深慨

盤子城

前登盤子城山隘勢欲迫路迴土峭絕傍夾千仞壁石
狀如矩斲巨細總方直無泉土脈死草木盡改色高巔
有堡障重門閉重棘陰慘行人險惡意叵測信知狐
鼠輩得在此中匿我生好壯觀努力更攀陟立久日將

晡浮雲渺鄉國

天井關

峯迴抱深壑下視天鑿井昔人建重關扼險備邊警
鑿久已絕垣石尚森整峩峩尼父祠門掩衆山靜
曾聞此回轍無復過斯境詢知鄉老言此事古未省
餘氓數家在破屋暮烟冷我行力稍疲景物不暇領
且為投宿來驚風夜愁永

渡沁

陸行長苦渴今渡沁河水奔騰走百灘聲遠聞數里我
來坐其涯肩擔欣暫弛不意山塢間偶得見清泚連朝
塵沙目豁爾淨如洗雖云倦行力對此亦足喜南風吹
青蒲白鷗忽飛起

沁水縣

一水隨山根宛轉流出迴灘聲繞縣門孤城數家靜風
土殊可怪十人五生瘿土屋響牛鐸壁滿殘日景行遲
欲問宿連戶皆莫肯亭長獨見留半榻亦多幸呼童此

晚炊糲飯穀帶穎野藪不可得敢望肉與餅塗行乃至
此儉素當自省

太陰山

巍巍太陰山厓壁拔嶄峭積水嵌層墟凜若太古造凍
深草木堅僵立勢難撓高寒橫障空陽景未嘗到鄰有
義和墓欲問莫可弔如何於此地獨不被臨照至今山
中烏性莫識晴昊聊為志其事因之發長笑

女媧墓

空山兩高冢媧皇此中葬焦土積層巘勢助殿閣壯大
哉補天手功出千古上至今鍊餘石火氣夜猶放轟雷
常被護烈風日掀蕩陰林慘可畏怪木高數丈百鳥飛
繞枝欲止不敢向地靈氣所鍾祭禱土人仰經過謁祠
下幸獲拜神像

霍山

霍山古北鎮勢尊出羣麓山深異風景春盡樹未綠居
人苦多寒鑿土為住屋屋頂土元厚亦種麻與菽乃知

此方民猶有上古俗我欲拜其廟日斜去程促窻烟斂
暝色牛羊半歸牧征塗多嶮巖村館早尋宿

兵後過畢亭山

畢亭西去遠一過一淒然鴈宿蘆中月人歸草際烟漁
家多近水戎壘半侵田尚喜餘民在停舟問昔年

送曾伯滋赴西河將幕

上將初分閫儒官解習兵風旗春獵野雪帳夜歸營洮
水從岷下祁山入隴平知公能載筆草檄報邊聲

送朱知事

惆悵官亭酒如何送客頻尊前莫催別明日異鄉人

送呂庸南

雪色上征衣雲沙鴈自飛去家千萬里只解送人歸

送別沈德虔

江聲千里萬里客路長亭短亭後夜相思何處蘆花明

月沙汀

送張景則歸天台

浙江東去有名山路遠天台鴈宕間我未得遊空悵望
是君鄉里喜君還

明詩綜卷十

總校官庶吉士臣張能照

校對官編修臣閔惇大

謄錄舉人臣嚴儀

欽定四庫全書薈要

集部

明詩綜卷十一

詳校官編修臣王天祿



欽定四庫全書薈要卷二萬四百八十四

集部

明詩綜卷十一

翰林院檢討朱彝尊編

余堯臣

一首

堯臣字唐卿永嘉人元末自會稽入吳明初謫濠放還授新鄭丞有菜蕝集

靜志居詩話高季迪春日懷十友詩於余司馬堯臣云列戟衛嚴闔應無休沐暇夜飲余左司宅云燈銷月窺闌角警霜委砌答余左司沈別駕元夕會飲城南詩云故人念我有二子省內

郎官府中佐徐幼文菜蕘詩題為永嘉余唐卿
左司賦然則左司之稱本於越鎮將板授而司

馬之銜疑唐卿
曾仕於淮張也

秀野軒

濕翠浮草芽空青散木杪輕舟理橫塘歸人渡清曉棲
鴉返故巢潛鱗濯新藻倒景澹斜暉迴飈蕩晴昊衡門
夜不扃燕坐事幽討落葉秋自飄殘花春嬾掃我欲往
從之稅駕苦未早揮手謝孤雲去去沒蒼徼

王行三首

行字止仲長洲人洪武初為郡庠經師藍玉延
教其子連坐誅有半軒楮園二集

徐子元云行詩清雅第不

及高

楊

詩話止仲好談兵遊都門人或尼之笑曰虎穴
中好休息也既就涼國西塾數以兵法說涼國
涼國卒用是敗平居於十友中最契道衍贈之
序曰上人非若他人事佛奉師碌碌作沙門者
今天下亂已極且必治治然後出於時以發其
所蘊其上人之志與當世之人安知終無與上
人同其志者盍姑有所待也誦其言亦傾危之
士乎至墓銘舉例一書足為學文者津筏詩非
也所長也

題趙元臨高房山鍾觀圖

北苑貌山水見墨不見筆繼者惟巨然筆從墨間出南
宮實遊戲父子並超軼高侯生古燕下筆蛻凡骨云云
水墨中探破造化窟嘗圖得鍾觀景象昭雲日長松映
飛泉霞采互飄歛今朝見茲畫臨寫意無失慘澹入窈
冥稜嶒隔岑蔚高堂時一舒六月氣蕭瑟平生丘壑性
塵空欣已拂因之興我懷山中劖苓朮

趙吳興淵明像并書歸去來辭

後更畫
竹石

虛館坐清曉高秋零露時佳菊秀可餐墨葩含晚滋芳
馨發孤思寫此歸來辭餘興猶未已寒玉生疎枝孰謂
公子懷不與幽人期撫卷三歎息繫年非義熙

房山寒江孤島圖

千山萬山重復重畫力筆力鬪竒雄青紅蒼翠滿縑素
缺處淺碧分遙峯歷觀畫史每如是意謂此法由來同
昨嘗凌秋溯揚子一舸縹緲乘長風洪波吞天杳無際
出沒但有孤輪紅乃知山水有佳處到此始覺塵埃空

當時海岳應飽見落墨便自超凡庸不將層疊競工巧
遂使氣象齊鴻濛平生愛畫惟愛此苦恨妙法無能攻
九州之表有人物意象獨數房山翁茲圖咫尺便千里
小米大米追高蹤愛之歌詠乃常理濡翰自媿言非工
詩成忽復三歎息矯首長望青冥鴻

宋克一首

克字仲溫吳人明初徵為侍書出為鳳翔府同

知

詩話仲溫任俠自喜挾彈走馬學握竒陣法張
氏據吳欲致不得闔門却掃工草隸書祝京兆
評其書法天授而高侍郎為作南宮生傳盛譽
其詩侍郎又有酬宋軍諮見寄詩云少為鬪雞
兒鮮裘奮春明走馬出飛彈撇揆誇身輕氣服
諸俠徒不倚父與兄落花錦坊南美人理妝迎
酒酣迸五木脫帽吁輸贏及壯家已破狂遊恥
無成遂尋鬼谷師從之學言兵業成事燕將遠
戍三關營竒勛竟難圖迴臨石頭城覽時識禍
機不因憶萼羹飄然別戎府震澤還東征恥求
薦辟書傲然揖公卿知音竟為誰四海嗟惛惛
又答仲溫見寄詩云念昔文翰場弱蹤繼清塵
鳴絃東閣夜飛蓋西園晨誦之可
得其行槩矣惜其詩集罕傳也

秋日懷兄弟

相別幾多時相思淚滿衣家貧經難久世亂得書稀作
吏余誠拙從軍事亦非鄉心秋塞鴈盡日向南飛

呂敏一首

敏字志學無錫人元末為道士洪武初官無錫
縣學教諭有無礙居士集

書雲林畫林亭遠岫

憶過梁谿宅于今二十年賦詩清閣閣試茗惠山泉夜
雨牽離夢春雲黯遠天鄉情與離思看畫共茫然

陳則一首

則字文度崑山人洪武六年以秀才舉任應天府治中俄進戶部侍郎謫大同府同知遷知府

題雲林畫

落花愁殺未歸人亂後思家夢更頻縱有溪頭茆屋在也應芳草閉深春

孫蕢二十首

蕢字仲衍南海人洪武中授工部織染局使出

為虹縣主簿選入為翰林典籍復外補平原主簿罷歸尋除蘇州府經歷謫遼東坐黨禍死有

西菴集

黃才伯云仲衍詩初若不經意而氣象雄渾駁駁乎魏晉之風徐子元云嶺

南五先生惟仲衍清圓流麗如明珠走盤不能自定彥舉雄俊豐麗殆敵手也王元美云孫仲衍如豪富兒郎入少年場輕脫自好歐楨伯云明興五嶺以南五先生起軼視吳中四傑

李時遠云仲衍豪邁瑋麗足追作者其七言古體不讓唐人葉處元云先生五七言古風

雖唐人不能遠過曹潔躬云仲衍善言風景於廣州則云丹荔枇杷火齊山素馨茉莉天香國於羅浮則云紫極房櫂倚日開蕊珠樓閣中天起於雲南則云蠻官見容花布襖邛婦背鹽

青竹藍於武昌則云武昌城頭黃鶴樓飛檐遠
映鸚鵡洲漢陽樹白烟景濕行人如鷗沙際立
使未至其地者誦之亦當神往若酒徒散落黃
金空獨卧茆檐夜深雨松花酒熟人不歸瑤草
東風幾回碧風韻不減唐人他如荒蘿遶屋秋
夜涼山鬼吹燈冷光濕興闌移席傍寒梅雙眼
如貓對花碧亦不
失為韓冬郎語也

詩話自黃以下世所稱南園五先生也仲衍才
調傑出四人五古遠師漢魏近體亦不夫唐音
歌行尤琳琅可誦微嫌繁縟耳集句亦工若秋
水為神玉為骨芙蓉如面柳如眉遠籬野菜飛
黃蝶椽徑楊花鋪白氈去日漸多來日少別時
容易見時難三湘愁鬢逢秋色半壁殘燈照病
容野草怕霜霜怕日月光如水水如天鶴羣長
遠三珠樹花氣渾如百和香可稱巧合繼之者

如桂嶺瘴來雲似墨蜀江風澹水如羅風塵荏苒
音書絕人物蕭條市井空歸目併隨回鴈盡
離魂潛逐杜鵑飛長疑好事皆虛事道是無情
却有情綠水青山雖似舊紅顏白髮遞相催此
廬陵李楨昌祺所集也如眼前好惡那能定夢
裏輸贏總不真東澗水流西澗水錦江春似曲
江春雲收雨散知何處燕語鶯啼亦可傷千里
關山千里夢一番風雨一番啼慘慘悽悽仍滴
滴霏霏拂拂又迢迢此瓊州丘濬仲深所集也
如文章宇宙千年事江漢風流萬古情老去詩
篇渾漫與晚來幽獨轉傷神欲知世掌絲綸美
肯信吾兼吏隱名縱飲欲謀良夜醉殊方又喜
故人來乘舟取醉非難事送客逢春可自由登
第往年同座主抱琴何處覓知音疎櫓看織蠟
蛸網遠信閒封荳蔻花四海交游更聚散十年
京洛共風塵漫說蘭書催物役猶將談笑出風

塵未央樹色春中見茂苑鶯聲雨後新自歎馬
御常帶病也知光祿最能詩春浮玉藻寒波落
水滴銅龍晝漏長佳節每從愁裏過遠書忽向
病中開江淹衫筆空題恨荀令香爐可待熏小
院迴廊春寂寂北湖南埭水漫漫敢于世上明
開眼莫怪先生嬾折腰苦節難違天子命夢歸
偏動故鄉情舉世盡從愁裏老暮年初信夢中
忙酒酣嬾舞誰相拽客至從嗔不出迎緩帶輕
裘成昨夢濁醪麤飯任吾年古來賢達知多少
舊日人民果是非新結草廬招隱逸便應黃髮
老漁樵合歡却笑千年事奉使虛隨八月查復
有樓臺銜暮景但將懷抱醉春風故國山川皆
夢寐昔年親友半彫零此長沙李東陽賓之所
集也如病身最覺風露早離夢杳如關塞長此
休寧程敏政克勤所集也如一卧滄江鷺歲晚
千家山郭靜朝暉嗜酒何妨陶靖節能詩重見

謝玄暉此吳江周用行之所集也如坐看蕉葉
題詩句醉折花枝當酒籌閭闔迴臨黃道正樓
臺直與紫微連東風已綠瀛洲草閣道迴看上
苑花五夜漏聲催曉箭千門曙色鎖寒梅雲生
紫殿幡花濕月射珠光貝闕寒深院沈沈人悄
悄春風澹澹影悠悠笙歌縹緲虛空裏臺榭參
差烟霧中小院迴廊春寂寂前峯後嶺碧濛濛
離岸游魚逢浪返出林幽鳥向人飛雲開日月
臨青瑣花擁絃歌咽畫樓晴雲滿戶團頰蓋瀑
水侵階濺舞衣此錢塘沈行履道所集也如念
我能書數字至似君須向古人求此上海陸深
子淵所集也如卿月夜臨仙掌動御烟曾見袞
龍浮風烟迸起思鄉夢霄漢長懸捧日心病眼
較來猶斷酒新詩改罷自長吟江清露白芙蓉
死雲散天高秋月明斲竹水翻臺榭濕桐花風
軟管絃清蝴蝶夢中家萬里鳳皇聲裏住三年

愁將玉笛傳遺恨，暗擲金錢卜遠人。
路遠寒山人獨去，江涵秋影鴈初飛。
陶令久辭彭澤縣，山翁長醉習家池。
虛心願比郎官筆，感興平吟才子詩。
漠漠稻花資旅食，輕輕柳絮點人衣。
老妻畫紙為碁局，童子開軒掃落花。
細水浮花歸別澗，西風落葉掩重門。
烏啼深樹刷靈藥，馬飲春泉躡淺沙。
日落遠波驚宿鴈，月明芳戍起啼鴉。
共歡天意同人意，多說明年是稔年。
倦客閉門三日雨，野橋流水一犁烟。
侯門不把馮驩劍，客路空攜范蠡圖。
暮雨自歸山悄悄，高樓獨上思依依。
閒尋古寺消晴日，却聽疎鐘憶翠微。
日暮酒醒人已遠，烏啼花落水空流。
清風未許重攜手，好月那堪獨上樓。
魚躍鏡中將綠破，鳥還天外帶青來。
過橋樹葉邨邊合，隔岸柴門竹裏開。
碎心雨夜重檐溜，滑足春融一徑泥。
此廣州張績詩也。

絢朝衣莫言海上渾無地應是壺中別有家紅
樹枝頭聞犬吠寒山影裏見人家溪邊瑤草含
朝露天上珠簾捲曙霞烏啼雲竇仙巖靜樹入
天台石路新臺上鳳蕭秦弄玉鏡中珠翠李夫
人閒愁却恐驚巢燕往事應須問塞鴻楊柳亭
臺凝晚翠芙蓉簾幕扇秋紅醉依華屋春多麗
貴想豪家月最明天上吹笙王子晉雲邊度曲
許飛瓊淚殘秋雨遺塵鞭腸斷春風為玉蕭蝶
粉亂翻迎笑臉柳絲輕舞學纖腰恍疑瓊島翻
成夢只是長安不見人別酒不須花底勸淚痕
時傍枕函流看花誰與同攜手好月那堪獨上
樓望斷鴛鴦猶未見可憐蜂蝶却先知石窗花
落春歸處山店燈殘夢到時好夢肯隨胡蝶去
離魂暗逐杜鵑飛三春景色佳期誤半夜雨聲
前計非遠砌寒風號絡緯閉門疎雨落梧桐狂
客漫歌金縷曲佳人猶舞越羅衣紅樹暗藏殷

浩宅青山空遠仲宣樓那堪往事空牢落誰共
芳樽話唱酬此姑孰夏宏仲寬所集也如山橫

故國三年別江至潯陽九派分兩岸蘆花飛曉

雪幾家松火隔秋雲迢迢霽野雲陰合浙浙疎

簾雨氣通風月無情人暗換江山有待我重來

九重霄漢天將近萬轉雲山路更賒武帝祠前

雲欲散胡公坡上日初低此安成王佩扶所

集也如碧落有情空帳望春山無伴獨相求山

中習靜觀朝槿洞口經春長薜蘿啼鳥歇時山

寂寂寒鴉飛盡水悠悠人生有酒須當醉世上

浮名好是閒嶺樹重遮千里目故人那惜一行

書此海鹽朱樸元素所集也如柴扉茆屋無人

問斷岸寒流到底清歸鳥各尋芳樹去寒潮惟

帶夕陽還花開花謝常如此船去船來自不停

流水白雲常在晚山秋樹獨徘徊茶烟漁火

遙如畫江水雲山杳莫窮此金華童瓠廷瑞所

集也如萬里悲秋長作客一官羈絆實藏身此
崑山方鵬時舉所集也如鱸魚正美不歸去瘦
馬獨吟真可哀梁間燕子聞長歎樓上花枝笑
獨眠勸君更盡一杯酒與爾同消萬古愁此蜀
中安磐公石所集也如霜彫碧樹作錦樹色過
梭亭又草亭諸葛大名垂宇宙元戎小隊出郊
坵殘花爛漫開何益妙舞逶迤夜未休鐘鼎山
林各天性風流儒雅亦吾師已聞童子騎青竹
換取佳人舞綺筵休怪兒童延俗客不勞鐘鼓
報新晴病軀動覓藜林坐嬾性從來水竹居庾
信羅含皆有宅李陵蘇武是吾師烟絲碧草萋
萋長雨衰紅葉冉冉香蕊里相逢貪握手百年
多病獨登臺此香山黃佐才伯所集也如歸信
幾番勞遠夢愁心一倍長離憂自願勤勞甘百
戰莫將成敗論三分此戴天錫維壽所集也如
長疑好事皆虛事莫遣佳期竟後期素柰忽開

西子面芙蓉不及美人妝徒勞掩淚傷紅粉但
惜流塵暗洞房此劉芳節聖達所集也如世態
炎涼隨節序人情翻覆似波瀾笛怨柳營烟漠
漠馬嘶山店雨濛濛綠樹碧檐相掩映游絲舞
蝶共徘徊人世幾回傷往事愁心一倍長離憂
浮生已悟莊生夢末路虛彈貢禹冠敗葉殘蟬
連漢苑古烟高木隔棉州五千里外三年客一
寸心中萬斛愁返照入江翻石壁疎松隔水奏
笙簧鳥下綠蕪秦苑夕雲凝碧樹渚宮秋此甫
田陳言于庭所集也如念我能書數字至悲君
已是十年流新添水檻供垂釣許坐層軒數散
愁此廣州黎民表惟敬所集也如衰草夕陽江
上路漁歌樵唱水邊邨一樽春釀葡萄綠滿甕
秋香竹葉青僧歸黃葉林邊寺人候夕陽江上
舟此法所集也如願我老非題柱
客凡今誰是出羣雄因知貧病人須棄不露文

章世已驚逐客雖皆萬里去雄豪後遣五陵知
獨當省署開文苑未有涓埃答聖朝天子亦應
厭奔走諸公何以答昇平深山大澤龍蛇遠古
木蒼藤日月昏此關中南師仲子興所集也如
天下何曾有山水老夫不出長蓬蒿此南海陳
子壯秋濤所集也如朝雲暮雨連天暗野草閒
花滿地愁蘭亦舊路雖曾識子夜新歌遂不傳
自歎馬卿長帶病何曾宋玉解招魂追思往事
咨嗟久始覺空門氣味長瑤臺絳節遊俱遍粉
壁紅妝畫不成碧落有情應悵望白雲何處更
相期鶯憐勝事啼空巷蟬曳殘聲過別枝大抵
好花終易落爭教紅粉不成灰天長地久有時
盡物在人亡無見期踈捨看織蠨蛸網古木惟
多鳥雀聲去日已多來日少他生未卜此生休
珊瑚枕上千行淚白玉壺中一片冰不堪紅葉
青苔地早是傷春夢雨天更恨香魂不相遇真

成薄命久相思碧莎裳下攜詩草楊柳洲邊載
酒船春蠶到死絲方盡古柏重生枝亦乾此秀
水沈德符景倩所集也如孤權夷猶期獨往崇
山瘴癘不堪聞漫說簡書催物役可堪風景促
流年津樓故市生荒草落日深山哭杜鵑幸與
野人俱散誕不嫌門徑是漁樵此萊陽姜埰如
農所集也如早春重引江湖興懶性從來水竹
居千樹桃花萬年藥牛池秋水一房山側身天
地更懷古獨立蒼茫自詠詩天下何曾有山水
人間豈不是神仙王侯第宅皆新主富貴榮華
能幾時閉戶著書多歲月揮毫落紙如雲烟莫
愁前路無知己幾處蠻家是主人漢家城闕如
天上武帝旌旗在眼中此嘉興周質青士所集
也如芳草有情能下淚野花無語自生愁闕門
令尹誰相識江上漁翁未易名一曲正愁江上
笛十年如見夢中花世人不識東方朔谷口空

稱鄭子真獨在異鄉為異客自憐長病與長貧
那知白髮偏能長莫遣黃金漫作堆為客馬卿
真寂寞依劉王粲本淒涼坐中醉客延醒客鏡
裏今年老去年樹影悠悠花悄悄江籬漠漠荇
田田中郎有女誰堪託伯道無兒最可憐仙人
有待乘黃鶴壯士徒令感白虹啼鳥歇時山寂
寂寒鴉飛盡水悠悠羞將短髮還吹帽共踏清
歌又舉尊江上暮鴻遙送影湖南春草但相思
蒼山迢遞成千里明月何曾是兩鄉千里雲山
何處好十年書劍總堪憐波生野水鴈初落風
靜寒塘花正開獨坐黃昏誰是伴每逢佳節倍
思親共說陳琳工奏記焉知李廣不封侯水浮
花片知仙路草帶泥痕過鹿羣晚景莫追窗外
驥銷憂已辨酒中蛇此蘭谿胡山天岫所集也
予叔父芾園先生亦雅好集句客至觴行恒舉
數聯坐客服其工綴予所記憶者如細推物理

須行樂高視乾坤又可愁庾信羅含皆有宅伏
波橫海舊登壇蕭何只解追韓信賈誼何須弔
屈平料得也應憐宋玉不知何處弔湘君能將
忙事成閒事不薄今人愛古人豈有白衣來剝
啄便應黃髮老漁樵閣中帝子今何在河上仙
翁去不回謝朓詩篇韓信鉞老萊衣服戴顯家
笑拈霜管題詩句閒向春風倒酒翫野廟向江
春寂寂殘燈無皎影幢幢滕王高閣臨江渚漢
主離宮接露臺壺觴須就陶彭澤勳業終歸馬
伏波皆極自然陸務觀所云火龍黼黻手非補
綴百家衣者比也

擬古

三首

歧路一尊酒送君今遠行交持未及竟絲管激哀聲冉

金
卷十一
再歲華暮悠悠雲氣征馳車戒往路惻惻傷我情我情
默已傷歡愛不可忘昔為春花妍今為秋草芳秋草芳
有時夫君見無期獨宿坐長夜淚落如綆縻白日儻回
照孤懷君所知

華月散高樹列曜何參差流光射結綺思婦慘中闈良
人涉遠道感歎夜何其清聲發妙曲宛轉有餘哀妙曲
固可聽餘哀知為誰春至桃李妍歲暮華色衰居然獨
處廓顧影久徘徊

離離谷中樹燦燦春華芳枝葉何盛茂忽然隨風揚流
光有彫換物理安可常擾擾路傍子哀歌使我傷杪秋
天氣肅白露結嚴霜攬衣不能寐起視夜何長明月出
東壁衆星羅縱橫歲暮鴉鳩鳴百草青自黃遠道者誰
子驅車登太行太行鬱嵯峩天路無津梁興言念同志
涕下霑我裳

寄琪林黃道士

雨絕天景佳前榮樹光綠遙憐採芝侶遠在春山曲琴

歌久已斷酒賦何由續有約今夕同開樽掃茆屋

湖州樂

湖州溪水穿城郭傍水人家起樓閣春風垂柳綠軒窗
細雨飛花濕簾幕四月五月南風來當門處處芰荷開
吳姬畫舫小於斛蕩槳出城沿月回菰蒲浪深迷白紵
有時隔花聞笑語鯉魚風起燕飛斜菱歌聲入鴛鴦渚

白雲山

白雲山下春光早少年冶遊風景好載酒秦陀避暑宮

躡青劉鋹呼鑿道木棉花落鷓鴣啼朝漢臺前日未西
歌罷美人簪茉莉飲闌穉子唱銅鞮繁華往似東流水
昔時年少今老矣荔子楊梅幾度紅柴門寂寂秋風裏
送何都閩濟南省親至京還廣

伊昔關河事征戰君家嚴君擁方面君拜元戎領大藩
虎旗耀日光於雷北山之北南河南鯨波虎壘相巉巖
轅門上日開將閩白馬朱纓銀作銜軍中呼盧日向午
錦筵置酒夜擊鼓龍潭降卒解西歌翁源女兒學東語

有時俘賊珠海頭海門六月如九秋牙旗揮天虎豹怒
霹靂迸火魚龍愁銀漢淋漓洗穹昊嚴親入覲承恩早
角巾還第誰最高君與君家兄弟好竭來寧親東入齊
歸舟一繫蔣林西鶯花爛漫春如海歌舞流連醉似泥
蟾溪高彬故部曲開宴斗門橋下屋宣州黎子鶯兒黃
吳姬指纖白如玉酒酣耳熱悲故鄉孫蕢在座情更傷
關河北去五千里目斷南天如許長秦淮水生風似雨
十幅蒲帆醉中舉龍灣江口辭故人小孤洲北失前侶

知君第宅遶西湖門對羅浮列畫圖梅花白白想猶昨
盧橘青青今有無三郎今年三十幾平生與蕢最知己
明歲春還若寄書玉堂華館西清裏

往平原別高彬

銀壺綠酒霑春宴環佩朝回奉天殿平生不作兒女悲
獨向高彬淚如霰高彬昔年桑梓雄好賢乃有古人風
東林詩社靜來結北海酒樽長不空
謁來弓劍已蕭索
短髮如絲猶好客塞上葡萄火齊紅
宣州梨子鵝兒白

沈繇不獨重相知
文米今還勝昔時
小樓焚香每讀易
淨几把筆常題詩
今晨我作平原別
高彬不意情欲絕
芙蓉香冷不堪贈
楊柳枝黃未宜折
龍灣江口石城頭
一幅蒲帆萬里秋
暮雲紅樹儻相憶
應有音書慰別愁

次歸州

歸州城門半天裏
白雲晚向城下起
市廛架屋依巖巒
婦女提罌汲江水
巴山雪消江水長
城中夜聞灘瀨響
客船樹杪鈎石稜
漁父雲端曬罾網
家家蕪田山下犁

倒枯大樹燒作泥，居人養犬獲山鹿。
穉子縛柴圍野雞，楚王臺高對赤甲。
四時猛氣長颯颯，柁工鳴板避漩渦。
櫓聲搖上黃牛峽。

發忠州

顛風翻山雲黑黑，星河無光江翕翕。
搖船夜半發忠州，漩深浪緊船欲立。
宣公祠下灘嘈嘈，船頭著水低復高。
石稜割裂箕斗影，山鬼出雜魚龍號。
亦知風水莽回互，王事有程那得顧。
誰歌太白蜀道難，和我靈均遠遊賦。

下瞿塘

我從前月來西州錦官城下十日留回船正值九九節
巫山巫峽風颼颼人言濫湏大於馬瞿塘此時不可下
公家王事有程期敢憚微軀作人鮓人鮓甕頭翻白波
怒流觸石為漩渦柁工敲板助船客破浪一撇如飛梭
灘聲櫓聲歷亂聒緊搖手滑櫓易脫沿洄劃轉如漩風
半側船頭水花沒船頭半沒船尾高水花作雨飛鬢毛
爭牽百丈上崖谷舟子快捷如猿猱攏船把酒聊自勞

因笑輕生博奇好吟詩未解追謫仙天遣經行蜀中道
巴東東下想安流便指歸州向峽州船到岳陽應漸穩
洞庭霜降水如油

題蘇名遠畫竹圖

蘇郎寫竹如寫帖珊瑚為枝篆籀葉寒梢不及三尺長
遠勢直與青冥接青冥不辨西與東雲光竹色俱空濛
飛廉排山振鷲鷲霹靂迸火驚蛟龍奇搜不獨竹色老
竹傍有石仍更好想其落筆當酒酣人間屏幃愁絕倒

近時吳興趙子昂最能寫竹窮青蒼蘇郎晚出繼芳躅
湖海二妙相輝光十年不到瀟湘浦環佩空懷玉簫女
相期共泛書畫船濃墨淒迷掃烟雨

送翰林典籍張敏行之官西上

燉煌城下沙如雪燉煌城頭無六月關西勁卒築防秋
捷書夜半飛龍樓九重下詔徵貔虎推轂上將開都府
黃旗卷日大軍行旄頭化石夜有聲燉煌迢迢五千里
十月即渡黃河水將翩翩才且雄平戎不數貳師功

叱咤猶在輪臺北匹馬已入渠黎國左校偏裨晚射鵰
倚鞍醉索單于朝西山黑風吹墮瓦霜角吹秋鳴一作塞
垣下太平今見遠宣威君往從戎幾日歸幕下文儒兼

解武詞林從此有光輝

周青士云
嘉州遺韻

武昌別魯侍儀舍人文濬

嘖嘖復嘖嘖人生交契真罕得我居翰苑君儀曹幾載
相聞不相識君名早已播南衢出入金門早奏書不謂
同乘建業水還來共食武昌魚武昌魚肥春酒好竟日

流連得傾倒黃鶴樓頭葉亂飛金沙洲上秋將老狂歌

謔浪清致同看君更有古人風才如關西楊伯起氣一作

性似城東陳孟公相親未幾還分手可憐新知樂未久

君隨征鴈入巴陵我挂雲帆泝川口歸期去去各悽然

今夕星河共一作各一天秋晚還期來促膝與君同賦遠

遊篇

冬至

冬至至日日初長久客客懷懷故鄉梅蕊惟愁雪爛漫

柳條又是春相將
嬾朝違世真自笑
憶遠寄書人未央
海門關外暮雲合
應有南還征鴈翔

秋風

秋風淅淅吹江亭
汴河之柳猶青青
黃姑東渡會七夕
白帝西來朝百靈
初開琪樹已云落
遠別客愁今未醒
欲寫鄉書寄南鴈
故園萬里天冥冥

懷四川

草堂烟樹入青霄
漢殿荒臺秀黍苗
宇宙大一作名今

尚在風雲霸氣未全銷
寒星夜落支機石
錦水春明駟馬橋
花柳舊遊今幾載
西風蓬鬢影蕭蕭

龍江夜泊

蔣山山頭秋月明
龍江江上暮潮生
行人又是金陵客
卧聽西風鼓角聲

寄王彥舉

綠楊陰下玉驄嘶
絲絡銀餅帶酒攜
夢入南園聽夜雨
不知身在蔣陵西

出蜀

白帝秋高木葉黃蜀中長是雨浪浪瞿塘水落漩渦小
一路看山到岳陽

王佐 五首

佐字彥舉家本河東元末侍父宦南雄遂占籍
南海洪武初徵至京師授給事中有聽雨軒瀛

洲二集

黃才伯云彥舉才思雄渾體裁甚工
趙懷璣云彥舉古風歌行伯仲高岑律

詩絕句方
駕虞揭

詩話彥舉與孫仲衍結社南園開抗風軒以延
嶺表名士及為給事孝陵賜宋學士黃馬帝為
作歌命詞臣和彥舉有臣騎黃馬當赤心之句
賜鈔一錠然其詩遠不及仲衍而當時之論云
構詞敏捷王不如孫句意沈
著孫不如王不可謂定評也

唐仙方伎圖

開元天子承平日錦繡山河壯京室金殿璇題表集賢
玉屏粉繪圖無逸夔龍接武居阿衡萬方旭日當文明
衡山仙人一作老仙何所有亦復通籍承恩榮縞衣黃一作白
髮醜顏老自說時來致身早綵篋初開玉仗分白驃突

出銀鞍小榻前製號賜通玄始信人間別有天樓船未
遣蕊珠賜歲籥俄更天寶年九齡歸卧曲江上牛郎又
入中書相花雨香飄蘭若鐘柳雲春拂一作撲金雞帳萬
幾日少樂事多梨園法譜聲相和鬪雞舞馬看不足不
獨仙人呈白驪仙人豈是呈仙伎畫者傳之有深意延
秋門外羽書飛却駕青驪向西避青驪劔閣雨淋鈴長
路一作段閒愁尚不勝不道畫圖今若此碧雲芳樹滿昭

陵

醉夢軒為錢公鉉賦

東吳高士索賦醉夢詩我亦醉夢無醒時問君醉夢緣
何事君言不解其中意但知痛飲復高眠即此悠悠是
生計乾坤偃仰如蘧廬心寓洪荒太古初人皆掉舌譚
臧否君方默坐糟丘底人皆明目辨妍媸君獨黑甜渾
不知君不見汨羅江邊人獨醒捐軀徒博千載名人生
適意此為樂何須苦覓揚州鶴竹葉杯中閱四時蘆花
被底舒雙腳錢公錢公真吾師平生此意君得之我生

落魄惟貪飲，百事無聞只酣寢。生死真同力士鎗，榮枯
付與邯鄲枕。行行無何有之鄉，麒麟作脯瓊為漿，借得
仙人笙與鶴，三清八極同翱翔。

憶舍弟彥常

庭草秋仍綠，江楓晚漸稀。年光隨水去，功業與心違。遠
海猶傳箭，殊方未授衣。翩翩南去鴈，故作一行飛。

書所見感舊

小小銀箏壓坐偏，曾將古調寄新絃。芙蓉綠水秋將老

鸚鵡金籠語可憐
兩鬢秋霜明鏡裏
十年春夢夜燈前
湖山隱約人何在
空負當年罨畫船

美人紅葉圖

謝家夫人詠柳絮
黃陵女兒歌竹枝
誰信長門秋色澹
西風黃葉斷腸詞

黃哲十首

哲字庸之番禺人
明初用薦拜翰林
待制侍太子讀書
尋兼翰林典籤出
知東阿縣升東平府

通判尋坐法死有雪蓬集

詩話嶺南無雪惟楊孚宅僅一見之杜子美詩所云南雪不到地也庸之度嶺而北倚蓬聽雪詫曰天下奇音莫是過矣歸構一軒名聽雪蓬鄉里遂稱為雪蓬先生其五言詩源本六代七言亦具體品當在仲衍之下彥舉之上

自君之出矣

自君之出矣無處託鱗音思君如晝燭淚盡不明心

過梁昭明太子墓

帝子降南浦飄飄蒼桂陰神飈迴震闕玄跡閱坤岑鳳

陵輝璞蘊龍沼媚珠沈文藻絢華黻芳芬揚素襟遺編
軼正雅曠代馳徽音玉馬風雲變金鳧歲月深霜蘭秋
被坂烟蘿夕翳林采蘋思永薦捐玦遂幽尋靈脩忽爾
逝歲晏勞予心遼東鶴馭遠緱嶺鸞笙吟眇眇因懷昔
營營徒慨今瑤華竟衰歇惆悵雍門琴

黃才伯云混選
詩中不可甲乙

東平謁堯祠

初政禮羣秩晨趨郛陰郭稽古詢道源放勳久徂落齋
宮委華祝黼辰銷丹堊庭榛雉升裳蘚宗彝剝惟馨

思可薦廢墜予猶忤緬言垂衣時東狩茲方岳儀像儼
欽明聲容被繇邈茆茨遵曩儉階莫傳舊朔遺澤紛在
斯今皇仰先覺亦播康衢謠紹爾雍熙樂

秋夜雜興呈涂典範穎

璿杓運西宇華月麗中楹坐知流序易遙夜秋風生銀
漢呈霄景金堂含夕清柔條棲湛露嘉蕙茁幽莖撫迹
遂成感如何君遠征相思雲陽浦峒堯限玉京寸心渺
何極搖蕩如懸旌

舟次靈洲候廣雄飛使回不至

湛露晨未晞秋華被原隰征塗夙已戒承命履遐邑桂
水寒悠悠揚帆望不及川鱗想同泳羈羽尚云戢維楫
乖素期臨流重於邑睠然桀溺耦詐灑楊朱泣惆悵芳
菲情日暮空佇立

與伯貞或華二友會

二妙聯英標睠言顧榛莽良晤諧宿心玄談慰幽愴江
蘼澹新綠谷鶯聞遠響感此離索情浩蕩烟霞想夷白

抗浮雲臨清延素賞何因繼芳躅一丘同偃仰

錢區伯寬領歸善邑教

橫塘候秋色芳蕖颯已變渺渺波上舟忽如翔風燕琴
觴激幽思護豆徒有踐所念同襟者飄飄各鄉縣章縫
恊冲素况復斯文彥此邦多奇勝名山蔚葱蒼暄壑棲
雲霞寒松閱霜霞爾行問津處沮溺因可見

贈劉仁仲昆季還浙東

沈憂自多緒復此送歸人昨夜淮南雨不知芳樹春
楊

來持別酒相與慰
茲晨日暮行艫渺
東南彌越津

扶溪春望

溪頭望春春色深
美人不見勞予心
綠波渺渺向南浦
罨畫樓臺芳樹陰
天涯滿目丹青障
春日春花兩搖漾
翡翠蘭苕不可思
鴛鴦桂樹長相望
相望相思雲路遙
金塘流水亂春潮
採菱風急桂舟晚
疑是當年揚子橋
橋邊楊柳青青好
惆悵春心被花惱
浦口迴船欲訪君
相思一夜蘼蕪老

游洪範池與劉文正

洞門斜日照金潭千尺藤蘿挂石龕
騎馬獨來高處望
滿山松柏似江南

李德五首

德字仲修番禺人洪武中用薦授雒陽長史遷
濟南府經歷調西安改漢陽教諭陞義寧知縣
有易菴集

詩話長史好效長吉孫仲衍戲之曰子誠
混元皇帝孫也然其詩實與長吉相遠

送友回真定

君自邯鄲來復向邯鄲去邯鄲月色好夜照江南樹太
行多峻坂中有羊腸路往來不憚煩知君為親故

棲雲菴

石室凝紫烟空洞懸石乳陰崖含風泉終日灑飛雨臨
流結精舍六月不知暑道人養清虛適與高僧處垢淨
俱已忘孰為舍與取諸幻既遠離白雲日相與何當謝
時人來作塵外侶

種麻

種麻滿東園種花亦盈畝麻生但芄芄花發映戶牖容
華能幾時零落他人手豈如為締絡與君同永久向來
灼灼姿于今復何有

立秋日登漢陽朝宗樓懷鄉中諸友

湖山興不淺而我亦淹留得罪緣微祿懷君屬早秋澹
雲鄉樹遠孤月旅情幽借問衡陽鴈何時到廣州

金陵逢趙汪中

十年長契闊萬里各分飛歧路風烟杳江湖消息稀加餐俱努力訪舊各霑衣春草無勞綠王孫自不歸

趙介二首

介字伯貞番禺人屢薦辭免坐累逮至京道南昌卒于舟中後以子純貴贈監察御史有臨清

集

陳廷器云臨清出入漢魏盛唐諸大家間與而尤究心三百篇之旨以故所作出乎情性

止乎禮義讀之有闕世教非若世之絢采色調聲響者所能及也

詩話伯貞絕意仕進植雙松於庭榜曰臨清蓋以淵明自擬也屢往還西樵山中有索題詩者

去不顧其集雖不傳然名在五先生之列乃刊
詩者去伯貞而冠汪忠勤於卷首可為失笑也

聽雨

池草不成夢春眠聽雨聲吳蠶朝食葉漢馬夕歸營花
徑紅應滿溪橋綠漸平南園多酒伴有約候新晴

瑤池

宴罷瑤池暮雨紅碧桃花落幾番風重來八駿無消息
擬逐青鸞入漢宮

林鴻十六首

鴻字子羽福清人洪武初以薦授將樂訓導久之拜禮部員外與高棟陳亮等同時稱閩中十

子有膳部藁

劉子高云子羽詩已窺陳拾遺之與大有唐開元之風李賓之云

子羽詩專學唐人極力摹擬不但字面句法并其題亦效之開卷驟視宛如舊本然細味之求

其流出肺腑卓然有力者指不能一再屈也

徐子元云子羽師法盛唐唐臨晉帖殆逼真矣

惜惟得其貌耳穆敬甫云員外自負良高晚

與浦舍人結社愈詣妙境兩人皆詩家俊豪也

胡元瑞云林員外諸體皆工五言律尤勝置

唐錢劉間不復辨別七言如珠林霽雪明山殿

玉潤飛流帶苑牆氣色高華風骨通爽顧玄

言云林員外才情藻麗如遊魚潛水翔鳶薄天

高下各適情性 蔣仲舒云子羽命才充裕標格華秀難以隄柳宮花之句得名他作實多勝者 李舒章云子羽如出林新鶻羽翻初成宋軾文云明初闈中詩人子羽為冠王弼州呵為小乘要亦是作家

詩話闈中十子子羽稱巨擘焉而循行矩步無鷹揚虎視之姿此猶翡翠蘭茗方塘曲渚非不美觀未足與量江海之大

感秋

撫劍中夜起氣候何淒清天高白露下北斗當前楹
嗷嗷雙飛鴻隨陽亦宵征微禽爾何知寒暑嬰其情始知

玩物化中復念吾生三十志有立一經尚無成緬懷古
哲人信與大運并道在無終始時來暫衰榮感歎不能
寐延首東方明

飲酒

儒生好奇古出口談唐虞儻生義皇前所談乃何如古
人既已死古道存遺書一語不能踐萬卷徒空虛我願
但飲酒不復知有餘君看醉鄉人乃在天地初

金雞巖僧室

遠公青蓮宇百尺構雲闕一徑入松蘿山泉濯苔髮石
房彈玉琴清響在林樾夜來滄海寒夢遶波上月微吟
白雲篇高興了未輟未能悟聲聞安得離言說

沈山子
云頗似

王龍
標

遊芙蓉峯

密竹不知路渡溪微有蹤懸知石上約定向松間逢物
候變黃鳥菖蒲花蒙茸相望不可卽裊裊霜天鐘

經東山別墅

別墅在東山經過感疇昔縱橫醉時墨猶在池上石林
氣颯以涼山容澹將夕緬懷攜手人念念不能釋

精巖寺

香刹象天界名僧辭世氛一峯獨凌削衆壑相氤氲作
禮向金仙宴林投鶴羣山犬銜人衣却走避腥葷於時
春向暮林亭謁餘曛蒼然草木氣盡濕西江雲登閣見
千里眇懷滄海濱山鐘忽播蕩應此悟音聞

送吳士顯

吳生跌宕人脫畧當世事欲識平生心悠悠江海是布
衣何飄飄孤劍千里至斗酒未及歡看雲起歸思長風
吹古城寒日下秋水分手從此辭車塵望中起

齋中曉起

颺颺城鴉散蓼蓼戍鼓絕空庭寂無人衣上有殘月爽
氣山前來吾襟抱冰雪

秋夜憶周模

傾蓋一分手沈思長在襟況茲離居夕復此秋城砧露

下葉初落草根蟲又吟雖云感物候終念曠幽尋劍水
東南流故人千里心無因達尺素夢遶青楓林

江閣秋雲圖

山容初斂夕雲氣已歸壑何以散沖襟孤琴坐江閣美
人期不來天寒楓葉落

賦得獨樹邊淮送人之京

君不見秦淮水流東到海淮邊獨樹如車蓋九月微霜
赤葉乾枯枝颯颯鳴天籟枝上啼鴉散曙烟枝頭殘照

咽寒蟬離人留飲停車騎俠客相逢挂馬鞭南國高僧
從此去駐錫雨花臺下路一飯淮邊洗盃時六時晏坐
祇園樹野鶴孤雲任往還禪心不道別離難山中亦有
長松樹待爾青青共歲寒

經綺岫故宮

行人曉飯青山裏驅馬蒼茫經洛水昔聞綺岫盛繁華
不謂荒涼今若此憶昔行宮初構時梯巖架壑相逶迤
美人桂殿夜看月公子柘弓朝射麋翠華一去金門鎖

露電飛螢山葉墮往事吹殘牧笛風危基半入樵人火
今古消沈能幾回春風依舊野花開君王巡狩不復見
禾黍空山烏雀哀

巫峽啼猿歌送丘少府歸四明

巫山巫峽連三巴猿啼三聲客思家停舟聽之聲未了
却過青枝猶裊裊野人昨來錦官城清秋滿峽啼猿聲
黃牛灘下怨楓落白帝祠前哀月明商聲清冽羽聲亂
倏忽東崖復西澗久客聞之淚欲乾壯夫聽此魂亦斷

故人歸卧越山雲憶得蹄猿歌送君扁舟獨宿剡溪夜
叫月三聲誰共聞

送高郎中使北

漢使臨邊日天驕已請和看花辭紫陌犯雪渡交河水
草留行帳雲沙想玉珂誰知清漠北婁敬策居多

鍾廣漢云

絕似郎士元

留別蔡秀才原

別離無遠近暫去亦傷神正是千山雪誰悲獨往人江

空螺女夜花暗冶城春不見同游侶酣歌淚滿巾

憶龍門高逸人

浮亭露飲玉樽空千里心期此夕同海路想經春草綠
越吟愁對夜燈紅他山花發鶯啼後別墅春歸積雨中
聖代祇今無隱逸不應多病卧孤蓬

陳亮二首

亮字景明福州長樂人明初累詔不出有儲玉

齋集

李時遠云亮詩
冲澹有陶韋風

夜泊古崎

寒山夜蒼蒼清猿數聲響風生蘆葦鳴水落洲渚廣月
落知潮來時聞人蕩槳

秋暮懷劉宗魯

海國別來久長懷瓊樹枝閒齋坐幽獨悵望秋風時自
非物外人邈焉難與期空傷綠華歇坐惜白日馳對酒
更愁予勞歌空爾思

唐 秦 一首

泰字亨仲福州閩縣人洪武甲戌進士授行人
終陝西副使有善鳴集

江上書懷寄周大林大

昔年曾共醉蘭舟明月閒情憶舊遊
獨客荒邨空向暮
異鄉多病畏逢秋
殘烟野戍聞寒笛
落日楓林見驛樓
為報別來憔悴甚
漫因尊酒一消憂

鄭定一首

定字孟宣福州閩縣人陳友定辟為記室友定

敗浮海亡交廣間久之還居長樂洪武中徵授
延平訓導歷齊府紀善終國子助教有澹齋集
伏波祠懷古

荒祠衰草已淒然猶有居人話昔年銅鼓苔生秋雨後
石牆花落夕陽邊竹書早著平蠻策沙井空餘飲馬泉
詞客經過休感慨雲臺麟閣總寒烟

王 襄一首

襄字中美閩縣人洪武癸酉舉人官至王府紀

善有養靜集

題秋林泉石圖

高林頗深邃遠洲亦縈紆風景亦何異中有隱者廬陽
崖落日明陰磻浮雲虛耕野見秋火扣舷聞夜漁竭來
塵網中機務日相拘念茲膏肓疾媿彼泉石圖抱拙謝
簪黻養素宜琴書俯仰天宇寬所樂恒有餘

高

棟八首

棟字彥恢仕籍名廷禮長樂人永樂初以布衣

召入翰林為待詔久之陞典籍卒於官有木天

清氣嘯臺二集

林尚默云詩始漢魏至唐極盛宋失之理趣元滯於學識而不

知由悟以入自襄城楊士弘始編唐音然知者

尚鮮先生選唐詩品彙議者服其精博平生賦

詠流傳海內又能書工畫時稱三絕俞汝成

云漫士意興俱佳而歌行尤勝顧玄言云翰

籍才識博達惜文多意少且乏新興至擬古諸

作頗擅雕蟲往往有青於藍者李時遠云廷

禮深得唐人風致李舒章云

廷禮如製錦善手頗有尺度

詩話廷禮擬唐如薛稷鍾紹京之雙鉤終下真

蹟一等五古若長空一飛鴈落日千里至夜色

不映水微風忽吹裳銜杯雙樹間百里見海

色飛雨一峯來微雲度疎竹不失唐人遺韻

九月八日郭南山亭宴集分得下字

海國霜氣涼秋聲落遙野乾坤肅以清
收納屬多暇出郭尋幽期同人命軒駕
載酒入翠微憑高憩層榭蒼山橫黃雲
大江天同瀉飛雨霞際晴夕陽鴈邊下
江山滿陳迹今古成代謝高興殊未平
臨風獨悲吟

同羣公餞鄭五秀才至鼓山寺分題贈別賦得臨滄亭

方前海上秀中峯開禪宮飛亭挂空翠
直上臨方蓬溟

漲在几席天光映簾櫳目極萬里外但見青濛濛曙色
從東來晃然靈境空登臨豈不偉別意歎無窮

賦得羅浮霜月懷二逸人

海國梅始白飛霜動鳴鐘寒空一片月挂在羅浮峯夜
色不映水清光與之同百里皆瑤華千林閔幽風蕭條
巖際葉嘹唳雲邊鴻遠客起遙念滄波思千重夢迴明
鏡沒寂歷聞幽蛩

題邑生陳溢鍾山草堂

鍾山抱藍田水木含清氣愛爾靜者居草堂在山翠簾
櫳映竹開几席侵花置野客載酒過山僧抱琴至陶然
接歡賞邈爾成幽契月出天海空雲生石門閉岱溪樵
唱來沙頭松聲細佳趣足淹留遠心更迢遞維時屬休
明巖穴無遺棄終南登捷徑北山裂荷製予亦問山靈
斯人果忘世

賦得燈前細雨贈別鄭浮丘

野館昏色來明燈靜深塢故人惜暎違共此尊前雨寒

影明遠心夜深帶離苦飄蕭初拂席
岵杏仍近戶重靄濕餘芳宿雲暗
平楚明發送君行淒淒滿南浦

水竹居

清溪入雲木隱處林塘深微月到
流水泠泠竹間琴虛聲起遙聽天
影激遠心余亦鸞鶴侶將期此投簪

酬林一和閒齋見懷之作

東山遙夜鴈歸聲兩地相思舊感
生芳草白雲無那別春風黃鳥若
為情雙溪日下鷗波靜獨樹原頭
獵火明

誰道離居成寂寞好文地主久知名

擬蘇許公題侍宴安樂公主新宅應制

飛構雲邊帝子家宸遊天上駐仙車
玉杯春醉平陽館銀漢秋行博望查
萬樹芳花迎日吐千條弱柳向風斜
皇情愛物歡無極能使羣心戀翠華

蔣仲舒云蓮斤成風信堪膾炙胡

元瑞云諸詩殊有唐風國初襲元此調罕觀

王 偁 七首

偁字孟陽其先東阿人從父翰宦流寓閩中洪

武庚午舉人永樂初用薦授國史院簡討命參

英國公張輔軍事坐黨下獄死有虛舟集解大紳云

孟揚詩欲凌駕盛唐徐子元云孟揚凌駕漢

唐見推解子東南天柱焉用洪達顧玄言云

孟揚典雅清拔綽有天寶俊聲蔣仲舒云虛

舟詩句從新鑄材自故來穆敬甫云王詩從

容典麗得風人體裁者曹能

始云孟揚詩本李白矯矯不羈

詩話孟揚才名與解大紳相伍其獲罪亦同然

詩格華整遠勝學士聞當日有明詩選本惜無

從見

之

車遙遙

車輪何遙遙西上長安道不見車上人空悲道傍草君
行日已遠恩愛難自保憂來當何如一夕夢顛倒豈無
中山酒一洗我懷抱但恐三春華顏色不再好車聲何
粼粼風吹馬蹄塵願隨馬蹄塵飛逐君車輪

短歌行

東風吹花墮錦筵綠楊搖蕩青樓烟主人自為鸚鵡舞
小伎更奏鴛鴦絃當杯入手君未醉落日已在西山巔
短歌一曲心茫然請看明鏡高堂上何須白髮悲芳年

入西山訪張隱士

兩崖噴飛瀑結屋烟蘿裏
山人不冠屨客至同隱几
獨鶴海上歸孤雲澗中起
淨掃白石牀風來墮松子

邕州

五管推名郡雙江接上游
人家蠻霧曉山雨瘴烟秋
遠客誰青眼殊方易白頭
今宵南極外分野望牽牛

楊秀才幽居

楊子幽居處閒窗面遠空
水喧明鏡裏雲落畫屏中
卷

慢留山月揮絃送晚鴻
何人問竒字載酒野橋東

宿巴陵聞笛

玉笛飄殘月下聲
空江秋入思冥冥
怪來楊柳移關塞
可是梅花落洞庭
半夜旅魂隨調切
誰家少婦倚樓聽
曉來更覓龍吟處
一點君山水面青

左江錄似友人

左江江水日潺潺
鳥語莎裳住百蠻
莫道天涯應在此
交州更隔萬重山

王恭

恭字安中自稱皆山樵者閩縣人永樂初以儒士薦起待詔翰林與修大典授翰林典籍投牒歸有白雲樵唱鳳臺清嘯草澤狂歌

顧玄言云安中思多

悽怨托喻頗深

林衡者云皆山善得中唐之韻

潛心風雅者

穆敬甫云王詩工而有調乃

如渭水寒流秦塞晚瀟陵殘雨漢原秋他鄉見

月長為客別路逢霜半在船鳥外明河秋一葉

天涯涼月夜千峯雲歸獨樹天邊小雪罷孤峯

鳥外青驛館夜殘明候火市樓霜曉度寒砧樓

桐葉上鶯新雨砧杵聲中憶故園幾處移家驚

落葉十年歸夢在孤舟家臨故苑長洲樹鐘度

寒山半夜船帆飛楚水舟中飯夢繞
淮山樹裏行均有大歷十子遺音

詩話袁景文以白燕詩得名然如月明漢水初
無影雪滿梁園尚未歸翻不若琴川時大本之
珠簾十二中間卷玉剪一雙高下飛也顧光遠
以白雁詩得名然如錦瑟夜調冰作柱玉闕曉
度雪侵衣亦不若王安中之夜雨蘆花看不定
夕陽楓樹見初飛也安中整練不及子羽而風
華跌宕多縹緲
之音固似勝之

去婦詞

刺促何刺促東家迎昏西家哭哭聲休使東家聞東家
車馬方如雲滿堂笑語看珠翠夾道風傳蘭麝熏浮雲

上天花落樹君心一失無回悟明知遺妾何所歸飲淚
行尋出門路青銅鏡面無光采妾心尚在容華改東家
新婦傾城姿似妾從前初嫁時

舟次鐔津

木落川氣涼鴻飛水容夕微燈射遠沙夜榜鄰幽石月
色棲處寒霜花坐來白遙見九華峯蒼蒼但蘿薜

初秋同叔敦彥時遊崇山蘭若

習靜厭紛擾幽尋給孤園脩然香林下似得桃花源一

鳥落天鏡千花秀禪門紛吾道機淺謬接甘露言月色
隱秋思荷香清夜魂終希偶緇錫永矣超塵喧

雞公壟

荒岡古墓雞壟邊蔓草離離生野烟狐狸養子隱荆棘
烏鳶作巢銜紙錢石麟薶沈土花濕月下精靈語還泣
此墳未必無子孫浮榮一去不復存誰家新冢高數尺
又買西家墳上石

感懷

不彈貢禹冠不結蕭朱綬幾處移家任轉蓬
半生失路惟耽酒兔園挾策竟徒然欲逐長沮學種田
秋風僅有相如壁舊物空餘子敬氈異鄉淪落無朋友
論交昨日今何有誤將偃蹇對時人豈謂新知不忠厚
萬事蕭然一布衣白頭夢想故山薇抱琴欲奏猗蘭曲
目送雲天斷鴈飛

聞笛歌送人之塞上

橫笛對離亭扁舟越江口月下何人最斷腸天涯怨別

驚楊柳此夜愁心獨對君
明朝悵別又離羣單于城上
吹羌管知爾相思不忍聞

題扇

山蒼蒼兮白雲谷
窅窅兮夕氛鴻高飛兮遠逝
蟬薄暮兮空聞泛木蘭兮容與
隱薜荔兮氤氳紛吾老兮既拙
誓相從兮夫君

書江山別意圖送羽人還神樂觀

羽人何處去歸事玉宸君
飛佩花間別橫簫鶴上聞過

關闕樹斷挂席楚江分想到齋宮夕圓丘候五雲

江樓聞笛

纖月挂風林晴樓覆夕陰誰家吹鳳管永夜作龍吟楊柳邊頭恨梅花笛裏心天明漢江上惟見水雲深

寄滄洲狂客

三年憔悴得君憐君上青雲益惘然客裏思鄉何日到天涯見月幾回圓未期歲晚同攜手預恐新正對別筵貧賤獨慙無可贈臨歧空憶繞朝鞭

鷓鴣

綠樹殘春暗雙飛錦翼齊
長沙有遷客莫向雨中啼

題水墨小景

白鷗門外孤艇黃葉山中一瓢惆悵青雲舊侶相思不
到漁樵

詠秋風

青蘋江上響蕭蕭吹得林間萬葉飄
何處淒涼最關別
數株殘柳灞陵橋

邨居

草徑茆扉帶軟沙
隔籬雞犬幾人家
青山盡日垂簾坐
落盡梭櫚一樹花

春鴈

春風一夜到衡陽
楚水燕山萬里長
莫怪春來便歸去
江南雖好是他鄉

老馬

百戰沙場老此身
長楸宮草幾回春
只今棄擲寒郊路

猶自悲鳴戀主人

山樓對酒

樓前積水映蒼苔
卷幔孤雲落酒杯
更盡一樽秋雨外
故山曾有幾人回

月下聞箏

愁心不見薛瓊瓊
何處銀箏半夜聲
腸斷十三絃上月
一絃一柱總關情

二馬圖

紫駟嘶逐玉花驄
曾是沙場百戰功
今日奚官重剪拂
落花芳草灞陵東

黃 玄 一首

玄字玄之侯官人官泉州訓導

詩話林子羽倡風雅於八閩從之遊者頗衆而獨矜許二玄為入室弟子其贈玄之詩云予也夙穎悟十五始知文冥心三十年尋源頗知津探竒始有得服膺如獲珍逝將覺後生庶以酬先民青矜二十徒達者惟黃玄持此欲有授二玄乃其人然二子詩太荏弱句續字湊不能成家似非孟揚漫士皆山之伍南皮李氏稱二子詩託興悠遠殊不爾也

河上立春

故國幾時別殊鄉今早春青陽開霽雪殘日送歸人漸
與雲霄隔空驚歲月新不堪零落處愁淚滿衣巾

周 玄一首

玄字微之閩縣人以文學徵為禮部郎中有宜
秋集

題青城圖

青城辭家仙路遙秋後白雲還見招商山老人不歸去

巖徑松扉長寂寥



明詩綜卷十一

總校官庶吉士臣張龍照

校對官編修臣閔悖大

謄錄舉人臣嚴儀